

INUIT ATAQATIGIIT

Inatsisartuni



04. juli 2018

Inatsisartut suleriaasianni § 37, imm. 1 naapertorlugu matumuuna Naalakkersuisunut imaattumik apeqquteqaateqarpunga.

Naalakkersuisunut apeqqut:

1. Ilinniarneq, ilinniartitaaneq tassaasoq Master i Bygningsfysik, saniatigooralugu ukiuni marlunni ilinniarneqarnissaasoq, nunatsinni najugalinnit peqataaffigissallugu pinngitsoorneqarsinnaanngitsoq, allattuulli diplom & masteruddannelsitut tapiiffigineqarsinnaava?

- a. Naamiuppat; Tamanna pillugu nunatsinni najugalinnit peqataaffigalugulu ilinniarneqarsinnaalersinnaanissaa Naalakkersuisut qanoq pilersaaruteqarfigaat?**
- b. Ilinniarusuttut tapiiffigineqartalernissaat akiliunneqartalernissaallu suliniutigerusuppaat? Aappiuppat tamanna qaqugu naatsorsuutigineqarsinnaava taava?**
- c. Naamiuppat taava tamanna sumik peqquteqarpa?**
- d. Naamiuppat, pequtaasut suut iliuuserineqassappat aporfiit ammarniarlugit?**

2. Naluneqanngitsutut DTU - Danmarks Tekniske Universitet siuttoralugu nunatsinni sanaartukkat pillugit ilisimatusartitsiniarpoq:

- a. Nunatsinni nunaqavissut misilittagaat atorluarumallugit nunatsinneersunik nunaqavissunik peqataatitsisoqarniarnerpa? Nunaqavissut peqataatinneqarnissaat angujumallugu Naalakkersuisut qanoq pilersaaruteqarpat?**

(Inatsisartuni ilaasortaq Peter Olsen, Inuit Ataqatigiit)

Tunngavilersuut:

Diplom & Masteruddannelser-nut tunngatillugu sunngu.gl-mi ilaatigut ima allassimasoqarpoq:

Issuaaneq allartippoq

Diplomimik masterimillu ilinniakkat

Piffissaq tamaat (uk. 1 miss.) ilinniartutut diplomimik masterimillu ilinniakkanut ilinniagaqarnersiaqarnissat qinnutigisinnaavat. Tamatumunnga ilanngullugu ilinniarnermut akiliummut tapinik qinnuteqarsinnaavutit.

Diplomimik masterimillu ilinniakkanut qinnuteqartut malugissavaat Namminersorlutik Oqartussat ilinniarnermut akiliut akilissanngimmassuk, immikkoortoq ataaseq imaluunniit fagi uteqqillugu ilinniaqqittariaqalissagukku.

Issuaaneq naavoq.

Sunngu.gl-mi allassimasoq tunngavissagaanni taamaallaat ukioq ataaseq sivilunerpaamik diplom & masteritullu ilinniarniaraanni tapiiffigittoqarsinnaavoq. Immaqalu tamarnarpiaq pequtaasimanerpa Master i bygningsfysikimik ilinniarusukkaluartut ukiuni marlunni ilinniagassaammat tapiiffigineqarsinnasimannginnerannut?

Taamatut oqarpunga, pissutigalugu saaffiginnittoqarnera tunngavigalugu paasigakku Master i Bygningsfysikimik ilinniarusuttoqaraluartoq taamaattoq ilinniarinnaanngilaat pineqartut namminneq akissaqartinngimmassuk, imaluunniit suliffeqarfiata ilinniarnera akilersinnaanngimmassuk.

Paasivara ilinniagassaq Master i Bygningsfysik aqqutigalugu, nunatsinni pissutsit tunngavigalugit sanaartorneq suna, qanoq ittoq naleqqunnerpaanersoq ilisimatusarfigineqarsinnaagaluartoq, taamaattorli ajoraluartumik ilinniarneq sulinerup saniatigut ukiuni marlunni (deltidsuddannelse) ingerlanneqartus-saammat tapiiffineqarsinnaanngilaq, suliffeqarfiup akiligassaatut naatsorsuutigineqarmat, tamannalu pequtaalluni nunatsinni iluamik ilinniarneqarsinnaanngilaq.

Nunatsinni silap aasami ukiumilu assigiinnginnerujussuata sanaartukkanut piunasaqaatai annertupput, unammilligassat annertupput, ullutsinni oquk ajornartorsiutaavoq, tamatumami pequtit ilagaat qangamut sanilliullugu imermik atuinerulernerput illullu sananeqaataasa atortullumi issittumut naleqqunnersut apeqqusernagit atuinerput.

Sanaartoriaaseq nunani iseqanngitsuni atugaq allanngornagu, ilami oqorsaannermut piunasaqaatigullunniit annikinnerutillugit sanaartorpugut, tamatuma ilaatigut kinguneraa ukiukkut illut isugutangaatsiaarsinnaa-neri, issimmallu silaannarissarnissaq orniginarpallaartarani, tamatuma kinguneraa illup ilua isugutattoq, peqqinnanngitsoq, inunnut atortunut illullu sananeqaataanut.

Paasivara ilinniartitaaneq Master i Bygningsfysik nunaqqatitsinnut assut pingaaruteqartoq, taamaattorli ilinniagassatulli allatut tapiiffigineqarsinnaanngitsoq, taamaattumik tamanna pillugu paaserusuppara Naalackersuisut qanoq pilersaaruteqarnerisut ilinniagassap tamatuma allatulli ilinniagassatut tiguneqarsin-naalernissaa anguniarlugu.

Aammattaq naluneqanngitsutut DTU siuuttoralugu nunatsinni sanaartukkat pillugit ilisimatusartitsiniartoq. Tamanna pillugu paaserunnarpoq nunatsinni najugalinnit, nunaqavissunit peqataatitsisoqarniarnersoq, nunaqavissut misilittagaat ilisimasaallu qanoq atorniarneqarnerisut paaserusunnarluni.

Qinnutigissavara apeqquteqaatima ullut suliffiusut qulit iluanni akineqarumaartut.